



“Dahlingz baenz caeux bae giz-lawz la?” Mehlingz cawj cug ngaizromh, caengz raen Dahlingz haer daiz, couh haer rug bae heuh de, raen ndaw rug hoengqvangvang, swnhbak cam goengqvan coenz he. Bohlingz cingq nyaengqnyinyi dajcoih aen ci rag huq, ndawsim caenh naemj baenzlawz lai rag di huq, cauh cienz ma ciengx 4 aen dungx ranzvunz, mbouj dawz haerjsim han: “Aiq bae lienhdang luba.” Mehlingz youh cam daeglwg gaenq ndaej 7 bi, daeglwg hix naeuz mbouj rox.

Sam vunz gwn ngaizromh sat, Bohlingz hai ci bae rag huq, daegnuengx Dahlingz cix haer rug bae hwnj vangjgoq. Deq daengz 7 diemj lai cung, caengz raen Dahlingz dauqranz, Mehlingz sim diuqbubbub. Dahlingz mbouj dwg deuz okrog bae ba?

Mehlingz youq diegyouq henzgyawj baenqbangh cimhra, hoeng, ngumhngaerz cungj mbouj raen. Mehlingz ganjvaiq dwk denva heuh Bohlingz dauqma. Gvanbaz haici okbae gvaengxgvax geij diuz gai, daengngoenz swng daemx 5 caengz laeuz sang lo, gvanbaz cij ngeix daengz bae baicuzsoj bauqanq.

Boux gingjcaz ciepdaih songde, vunz gig yiedsim, aeu bit geiq ndei le, doq daj denva coh baihgwnz veibau, youh sikhaek anbaiz vunz haici okbae cimhra. Sat le daengq gvanbaz de maranz deq denva.

Mehlingz baenzlawz youq ndaej onj, de heuh Bohlingz caiq haici ok gai bae ra, de couh naemj banhfap bae ra. Byaij youq gwnz roen, Mehlingz raen vunz couh cam. Lij aeu fwngz dagdag raurau, naeuz dahlgw de ndaej 14 bi, vunz sangseuq, miz 1.5 mij sang. Cam gvaq cibgeij boux, mbouj dwg ngauzgyaeuj couhdwg bifwngz, miz boux simndei lij nai de song coenz. Yienghneix guh, lumj duz nengznayen fouzgyaeuj nei, luenh bungq luenh ndonj, mbouj ndaej.

Mehlingz simdingh roengzdauj, lumj cuengq denyinij nei youq ndaw uk naemjnaemj gij saeh geij ngoenz neix. De fwt siengj daengz gienh saeh ngoenzlwenz. Ngoenzlwenz banhaet, Mehlingh mwh okdou bae cawx byaek, lumj bingzseiz nei daengqvah Dahlingz caeuq daeglwg yaek ciuqseiz hwnj vangjgoq, gaej dam guhcaemz. Cawx byaek dauqma, Mehlingz lau ndwet song boux lwg, couh laeglemx gven dou, laeglemx yamq haerj ranz

ma, de youh sibgvenq nyengqda ndumq haerj rug bae, cix yawjraen song cejnuengx de cingq angqfwngfwng boenz denswj youzhi. De doq ndatheiq ndaqnaeuz: “Sou mbouj nyinhcaen dingq vangjgoq, lij caeg boenz youzhi dem. Daegnuengx iq mbouj rox, dahcej hix mbouj roxsoq ha. Caiq boenz, gou dawz gvenggvak bae.”

Dahlingz iet linx myemmyem, ganjvaiq dawz doxgaiq sousib cuengq ndei. Dahlingz mbouj dwg aenvih gienh saeh neix couh deuz okrog ba? Hix cojgvaq lwgnyez lo, fat binghraq doxdaeuj, lwgnyez hix riengz bouxhung caez gyaeng youq ndawranz, baez gyaeng couh sam ndwen lai, baenzlawz mbouj mbwq, gaej naeuz lwgnyez lo, vunzhang cungj yaek fatbag bae. De dwg mbouj dwg yiemzmbwq doegsaw le, hixnaengz deuzhag suenq lo. Ngeix daengz gizneix, Mehlingz ganjvaiq bae ra Vangz lauxsae banhcujyin dahlgw, camcam Dahlingz youq ndaw hagdangz gij cingzcik hagsib baenzlawz yiengh.

Byaij daengz aen siujgih Vangz lauxsae youq, baujanh naj saepsaengsaeng laengz de youq baihrog bakdou, naeuz seizneix fuengzraq youqgaenj, vunzrog mbouj ndaej haerj siujgih. De cij ndaej dwk denva cingj Vangz lauxsae okdaeuj. Vangz lauxsae ndaejnyi boux hagseng de deuz okrog bae, hix simgip raixcaix, coenz lai mbouj naeuz, doq buet roengz laeuz okdaeuj raen naj Mehlingz. Song boux cungj raek goujcau ndwn youq doiqnaj. Vangz lauxsae naeuz, gij cingzcik Dahlingz ndei dangqmaz, gig haerjsim hagsib, mbouj raen de yiemzmbwq gvaq. Naeuz sat, youh nai Mehlingz naeuz, “Mwngz gaej you, gou fat siusik haerj ndaw ban veihsinginz bae, cingj gyoenq doengzhag doxcaeuq cimhra, vunzlai ra ndaej vaiq. Mehlingz coh Vangz lauxsae gungjhwet baiq baez he, couh byaijgoemgoem deuz lo.

Mehlingz biek Vangz lauxsae le, youh naemj daengz, dahlgw dwg mbouj dwg damzyoux ni? Seizneix miz noh miz bya gwn ndei yingzyangj gaeuq, lwgnyez ndangdaeij cungj majbongh, cib sam seiq bi vunz couh maz cungj rox lo. Baez ngeix daengz gijneix, Mehlingz daengx ndang doq hwnj naenggaeq, ndaw uk yut ok gij ciengzmienh lwedyanyan daeuj. Gij

haenx dwg dahlgw meh hujgeiq de, aenvih dahlgw damzyoux, deng daxboh fok geij coenz, doq hozgaek geggeg bae diuq laeuz. Dahlgw ciengx ndaej 14 bi lo, yaepyet couh song mbiengj doxbiek, bouxbyoemhau soengq bouxbyoemndaem. Hai! Caen hojlien z aen sim bohme h lajmbwn lo. Mehlingz yied ngeix yied lau, de sikhaek buet bae ra Dahfangh. Dahfangh dwg dah doengzhag cei q ndei Dahlingz. Dahfangh ndaejnyi Dahlingz liz ranz deuz okrog bae, hix dungxcieg fubfub, de doiq Mehlingz naeuz: “Daxheiz, mwngz gaej gip, gou ngoenzngoenz caemh de caezyouq, cei q roxyiuj de lo. Gaej naeuz damzyoux lo, lien z gij vah neix cungj caengz dwen gvaq. De mbouj dwg yiengh vunz neix. Mwngz aeu saenq gou.”

Gwnz gai dienhdang ronghsagsag, ndaw singz dauqcawq sing vunz cauzhoho. Mehlingz naiqnueknuek yamq haerj ranz ma, din baez unq, doq gyad naengh roengz sah faz bae. Ndaw uk caenh couxrim gij yiengh dahlgw sw hgeij. Daj iq daengz 14 bi, Dahlingz cungj dwg dah gvaigvetgvet ndeu, de roxsoq gvaq doengzban lwgnyez, mbouj yung h bohme h coi, de gag rox bang bohme h cawj ngaiz, baet ranz, miz baez lij bang daegnuengx saeg buhvaq, de mbouj laebluenh cam bohme h aeu cienzsawj. Song ngoenz gonq, de siengj cawx aen soujgih ndeu, Mehlingz hozunq vahsw nh lwnh de nyi, seizneix binghraq youqgaenj, bouqfaenj gven dou song ndwen lo, mbouj ndaej cauh saek faen cienz. Seizneix baihgwnz ngamq hawj haidou, hoeng, cix mbouj miz geijlai hek. Daxboh bang vunz rag huq hix cauh mbouj ndaej geijlai cienz. Ndawranz seizneix mbouj miz cienzyawz lo, deq gvaq ciengz binghraq neix menh cawx. Dahlingz couh mbouj ok sing lo, gag naebsim bae guh cozyez. Nanzdauh naeuz, de gag aeuqheiq ndaw hoz, caeg deuz okrog bae guhhong rom cienz cawx soujgih? Mehlingz youh gag ngauzgyaeuj sigsig, dahlgw de mbouj dwg yiengh vunz neix.

Mehlingz sim goenj baenz feiz, ukgyaeuj bongz dwk yaek aq. De naemj mbouj ok Dahlingz dauqdaeij vihmaz deuz okrog bae. De byaij haerj ndaw rug Dahlingz, gizneix fanfan, gizhaenx boekboek, muengh ndaej ra

raen de louz saekdi vah. De mbon daehsaw lumhlumh, youh dawz gobwnj saerjsaeuj. Gwnz congz, daizsaw, de song da gyaeploekloek, mbouj cuengq gvaq saek giz. Sawqmwh, youq bonjcozyez gwnz daiz, Mehlingz yawjraen mbaw cei j sij miz geij hangz ci h ndeu, de doq gaem hwnjdaeuj vaiqvet yawj roengzbae. Yawj sat, Mehlingz raemxda doq loenqbyoegbyoeg. Gwnz cei j sij naeuz:

Daxboh daxmeh, sou dwgrengz lai lo. Sou ciengx cejnuengx dou yung h bae haujlai cienz. Gou mbouj siengj hawj bohme h vih gou baenzlai sinhoj lo. Sou gaej ra gou, gou okrog bae gag ra cienz gwn. Deq gou miz cienz le, gou couh soengq ma hawj ndawranz. Sou louz cienz soengq daegnuengx hwnjha bae.

Dahlgw sou: Dahlingz
4 nyied 24 hauh

Mehlingz doq uet raemxda, doq gag damzbyoedbyoed: “Dahni q ha dahni q, mwngz baenzlawz yienghneix naemj, nanzdauh daxboh daxmeh ciengx mbouj ndaej mwngz ha, caj mwngz hung le, menh bang bohme h ra cienz ciengx ranz ha.”

Cingq youq seizneix, aen soujgih de yiengj lo. Mehlingz doeksaet yat, de saenzdwdwd cie p soujgih: “Gou…… gou dwg Mehlingz, mwngz dwg……” “Gou dwg baicuzsoj, mwngz seizneix youq gizlawz?” “Gou youq ranz, dahlgw gou baenzlawz yiengh lo?” Mehlingz aensim yaek saet ok aek daeuj lo. “Dahlgw mwngz ra raen lo.” “Caen ha?!” Mehlingz gikdoengh ndaej angqhemq hwnjdaeuj, ngamq siengj cam de seizneix youq gizlawz, doiqfueng youh naeuz: “Mboujgvaq——” Mehlingz sim baez cie g, doq gat vah cie p cam: “Mboujgvaq maz la?” Doiqfueng ndwnj gaemz myaiz he le, cij menhmenh naeuz: “De mbouj siengj maranz, cingj mwngz daeuj baicuzsoj cie p de baema.” O! Dwg yienghneix. Mehlingz soeng gaemz hei q he, fajnaj doq haiyab.

“Dahni q……” Youq ndaw baicuzsoj, Mehlingz gotdawz Dahlingz daejngoegn goeg. “Langh mbouj miz mwngz, daxmeh baenzlawz lix ha.” Bohlingz caeuq daegnuengx Dahlingz ndwn youq henz ndang, raemxda hix gvaengxloekloek. Geij boux gingjcaz riunyumnyum ngonzyawj song mehlgw neix.